

Staa-de Zeit

Bairisches
zum Advent



Adventliachtl



Zünd mar a Liacht o in dera Zeit!
A Liachtl is warm und voll Hoamlichkeit,
In der Stubn is jetzt guat sei, arwa da drauß
wuiselt der Wind und nackelt am Haus.

Jetzt san de Nächt, wo de Gspenster umgehn.
So sagn alte Gschichtn. I hob no koans gsehn.
Arwa wer woaß, am End is was dro?
Mir sehng so vui net, arwa gspürn tean mas do.

Guat und anderne Geister solls gebn.
Sans ebba Gedankn, de bloß in uns lebn?
Im Finstern falln uns de schiachn o.
Zünd mar a Liacht o! Na fliagns dawo.

